

Illoqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2022-mut naammassereersimasussamik Naalackersuisut pilersaarusoqquullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Siverth K. Heilmann, Atassut)

Akissuteqaat

(Ineqarnermut, Attaveqaasersuutitut, Aatsitassanut, Inatsisit Atuutsinneqarnerannut Naligiissitaanermullu Naalackersuisoq)

Siullermeerneqarnera

Inatsisartunut ilaasortap aalajangiiffigisassatut siunnersuuteqarneranut, Naalackersuisut sinnerlugit qujavunga.

Aallarniutigalugu eqqaassavara, ”Umiarsualivinnut Immikkoortumut pilersaarut 2017-2027” siornatigut akuersissutigineqartoq naapertorlugu Naalackersuisut Nunatsinni umiarsualivinnik ingerlatsimmata. Inuiaqatigiinnitsinni ingerlatanut pingaarutilinnut arlaqartunut umiarsualiviutigut aallaaviupput. Nassiussalierineq, aalisarnermik inuutissarsiuteqartut sullinneqarneri, ilaasunillu angallassineq ilaatigut pineqarput.

Aserfallatsaaliinissami pilersaarut naapertorlugu umiarsualiviit nutarterneqarlutillu piorsarneqartarput. Nuna immikkoortortanut tallimanut agguataagaavoq; immikkoortortaq ataaseq ukiumi ataatsimi nalunaarsorneqariarluni, ukiup tullissaani aserfallatsaaliugassat piorsagassallu suliarineqartarput, ilutigalugulu immikkoortortap tulliani nalunaarsuinerit ingerlanneqartarlutik. Taamaalilluni immikkoortortaq ataaseq ukiut tallimakkaarlugit nalunaarsuiffigineqartarpoq, aserfallatsaaliugassat piorsarneqarlunilu. Umiarsualivinni ataasiakkaani sioqqat patsisaallutik talittarfiit ikkalisimanersut, talittarfiillu qarsunneqartarnersut nalunaarsuineri aamma qulaajarneqartarpoq. Taamaattumik ataavartumik nalunaarsuisoqartarpoq, naammangitsumilli aserfallatsaaliisoqartarluni.

Taamaattumik tamassuma ukkatarinissaata pingaaruteqassusianut Naalackersuisut isumaqataapput.

Umiarsualivinnut talittarfinnullu aningaasaliissutinik inisseeqqinnissamut ukiumut 25,2 mio. koruunit immikkoortinneqartarput. Nutarterinerit piorsaanerillu saniatigut puttasut qaqinneqartarnerini aqqarneqartarnerinilu ingerlatsinermi aningaasartuutit kontomit tassannga aamma matussuserneqartarput, soorluttaaq umiarsualivinni tassanngaannartumik suliarineqartariaqarlutik ajoqusernerit suliarineqartarneri kontomit tassannga matussuserneqartartut.

Suliassat ukiut tamaasa tullerriaarneqartarput. Talittarfiit atorineqarnissaannut isumannaannersut ilaatigut nalilersorneqartarpoq. Anori, silap pissusaa, qarsutsisarnerillu talittarfinnut sunniuteqassanersut tullerriaarinermi pingaartillugu nalilersorneqartarpoq.

Umiarsualivinni aserfallatsaaliinissami kinguaattoorutit pillugit nalunaarusiaq Inatsisartuni qanittukku agguanneqarpoq. Killiffik nalunaarusiami tassani nassuiaatigilluarneqarpoq. Siunnersuuteqartup isumaliutigisai arlaqartut, kinguaattoorutit pillugit nalunaarusiaajumaartussami ilanngunneqarsinnaassapput. Taamaattumik tulliuttut allannguutissatut siunnersuuteqarusuppunga:

Talittarfinnik aserfallatsaaliinissami kinguaattoorutit pillugit nalunaarusiap nutarterneqarneranut atatillugu, ulittarneranut tinittarneranullu tunngatillugu talittarfiit qarsunneqartaleriartuinnarneri isumannaannerusumik aaqqissuunneqarnissaat Naalakkersuisunit ukkatarineqarnissaa pillugu, Inatsisartut aalajangiiffigisassaattut siunnersuut.

Taamaalilluni aalajangiiffigisassatut siunnersuut Inatsisartunit kajumittumik suliarineqarnissaanut ingerlateqqippara.